

Međunarodna konferencija BiH - deset godina od Dejtona i dalje

Izmjena ustava i ukidanje visokog predstavnika, pa onda članstvo u EU

Vlasti u BiH moraju se fokusirati na smanjenje brojne i veoma skupe birokratije, kazao Oli Ren ● On je istakao da zagovara ustavnu evoluciju, a ne ustavnu revoluciju

(Od našeg specijalnog izvještača)

ŽENEVA - Kompleksna ustavna struktura, finansijska neodrživost i visoki predstavnik sa svojim bomskim ovlastima dvije su najveće prepreke koje bosanskohercegovačke vlasti moraju savladati prije potpisivanja ugovora o stabilizaciji i priključivanju Evropskoj uniji, kazao je komesar EU za proširenje Oli Ren na prvoj plenarnoj sjednici Međunarodne konferencije Bosna i Hercegovina - deset godina od Dejtona i dalje, koja je u organizaciji *Asocijacije Bosna i Hercegovina 2005.* počela u četvrtak u Ženevi.

Dvodnevna konferencija, na kojoj će govoriti više od 500 učesnika iz BiH i cijelog svijeta, zamišljena je kao inicijativa civilnog društva u okviru koje će se pokušati pronaći odgovore na ključna pitanja dalje izgradnje države BiH i njenog priključenja evropskim integracijama.

Stvarni progres

“Vlasti u BiH moraju se fokusirati na smanjenje brojne i veoma skupe birokratije koja je prepreka za početak pregovora i potpisivanja Sporazuma o stabilizaciji i priključivanju EU. Drugo, uloga visokog predstavnika u BiH sa njegovim bomskim ovlastima je također problematična i ograničava vlasti u BiH da preuzmu potpunu odgovornost u provođenju reformi i odlučivanju o svim važnim pitanjima”, kazao je Ren i dodao da je došlo vrijeme kad vlasti u BiH treba da preuzmu više odgovornosti za budućnost zemlje.

Ren je kazao da je za zemlju koja pretendira da ima čvrste veze sa EU da u konačnici postane njena članica, neophodno da postigne takvo ustavno uredjenje koje će biti “kompatibilno sa njenim namjerama da ostvari napredak ka evropskim integracijama”.

“Ono što zagovaram je ustavna evolucija, prije nego ustavna revolucija i nadam se da će bh. lideri uspjeti da postignu takav sporazum prije narednih izbora”, kazao je Ren.



Oli Ren u razgovoru sa Wolfgangom Petričem i Jakobom Fincijem

AP

Ne treba voditi isprazne debate

Oli Ren je istakao kako ne bi trebalo voditi debate o tome da li ukinuti entitete ili debate o pravima naroda, nego o “izgradnji zemlje koja će biti sposobna i funkcionalna i u kojoj će svi građani uživati stvarnu slobodu i prava”.

On je dodao da je za multietničke zemlje poput BiH najprikladniji federalni i regionalni model uređenja.

Komesar EU je podsjetio da se i visoki predstavnik u BiH već priprema za fazu ukidanja svog ureda, da se bomske ovlasti visokog predstavnika primjenjuju sve rijede, što bi, smatra, moglo biti obećavajuće kad je riječ o pripremama za pregovore o Sporazumu o stabilizaciji i priključivanju.

“No, tranzicija od visokog predstavnika do punog preuzimanja odgovornosti od strane domaćih vlasti mora ovisiti o stvarnom progresu na terenu, a ne o obećanjima političara”, dodao je Ren.

Izazov za bh. vlasti

Naglasivši da je ova konferencija svojevrstan izazov za bh. vlasti, državni premijer **Adnan Terzić** je istakao da je ubijeden da će nasljeđnik **Pedija Ešdauna** biti posljednji visoki predstavnik u BiH. Terzić je kazao kako za zemlje zapadnog Balkana i BiH postoji samo

jedna alternativa - Evropska unija.

“Ispunjavanje uvjeta iz Studije izvodljivosti pokazalo je da BiH može svoje obaveze ispunjavati bez miješanja visokog predstavnika. Dokaz za to je 47 zakona iz Studije izvodljivosti koje su vlasti BiH same usvojile”, ustvrdio je Terzić.

On je na konferenciji za novinare nakon plenarne sjednice kazao kako bi bio sretan da su mandat od SFOR-a, umjesto snaga EU, preuzele domaće vlasti.

“No, situacija u regionu namće nam potrebu za stranim vojnicima u BiH”, naglasio je Terzić i dodao kako će ulazak SCG i RH u EU omogućiti BiH da jednog dana uputi zahtjev za odlazak stranih trupa sa njene teritorije.

Konferencija se nastavlja i danas radom 12 grupa, čiji će učesnici razgovarati o ustavnim promjenama, ekonomiji, obrazovanju, izgradnji države, kulturi...

Senita ŠEHERČEHĀJIĆ